

大方等陀羅尼經

卷四

百廿七  
可四

48653



大方等陀羅尼經卷第四

北涼沙門釋

法眾譯

護戒分第四

尔時文殊師利即從座起偏袒右肩右膝著  
 地白佛言世尊若有比丘世尊去世之後若  
 毀四重若比丘尼毀犯八重若菩薩若沙彌  
 沙彌尼優婆塞優婆夷若毀如是一  
 所犯重罪當云何滅佛言善哉善哉文殊師  
 利乃能請問如是等事汝慈悲勝故能發是  
 問汝若不發是問我終不說彼惡世比丘所  
 犯之過善哉善哉文殊師利汝今諦聽當為  
 汝說我去世後若有惡律儀比丘毀四重禁



可

默然而受檀越供養而不改悔當知是比丘  
必受地獄苦而無疑也我今當出良藥救彼  
比丘重病我去世後毀四重禁羞不發露汝  
今諦聽當為汝說

離婆離婆諦

仇呵仇呵帝

陀羅離帝

尼呵羅帝

毗摩離帝

莎呵

文殊師利此陀羅尼是過去七佛之所宣說  
如是七七亦不可數亦不可計說此陀羅尼  
救攝衆生現在十方不可計不可數七佛亦  
宣說此陀羅尼救攝衆生未來不可計不可  
數七佛亦宣說此陀羅尼救攝衆生汝今請  
問陀羅尼義我已說竟以此陀羅尼經救攝

未來世惡律儀比丘令其堅固住清淨地善男子若有比丘毀四重禁至心憶念此陀羅尼經誦千四百遍誦千四百遍已乃一懺悔請一比丘為作證人自陳其罪向形像前如是次第經八十七日勤懺悔已是諸戒根若不還生終無是處彼人能於八十七日勤懺

悔已若不堅固阿耨多羅三藐三菩提心亦無是處又文殊師利云何當知得清淨戒善男子若其夢中見有師長手摩其頭若父母婆羅門耆舊有德如是等人若與飲食衣服卧具湯藥當知是人住清淨戒若見如是一相者應向師說如法除滅如是罪各復次

善男子所謂比丘尼毀八重禁者若欲除滅八  
重禁罪先請一比丘了知內外律者陳其罪各  
向彼比丘比丘應如法而教此內外律所謂  
阿隸離婆其羅帝 羅帝婆 摩羅帝 阿

摩羅帝 莎呵

善男子此陀羅尼若有讀誦受持如法修行  
九十七日日誦四十九遍一懺悔隨師修行  
是諸惡業若不除滅終無是處善男子汝若  
不信吾今爲汝略說我昔愚行業因緣故十  
方虛空法界及大地土山河叢林盡末爲籌  
大如微塵尚可知數除諸佛等無人能知我  
所犯戒十方無邊我所犯戒亦復無邊微塵

無數我所犯戒亦復無數衆生無邊我所犯  
戒亦復無邊方便無邊我所犯戒亦復無邊  
法性無邊我所犯戒亦復無邊善男子我觀  
如是等業甚爲可畏上至菩薩下至聲聞不  
能救我如是等苦我即思惟如是事已便推  
求此陀羅尼典得已修行九十七日讀誦四  
十九遍聞空有聲而謂我言善哉善哉善男  
子乃能推求此陀羅尼典我時聞已顧視四  
方見有諸佛羅列在前一一諸佛手摩我頭  
聽我悔過善男子以是因緣我去世後若有  
比丘尼犯八重禁應當求此陀羅尼典讀誦  
修行若於夢中見如上事知彼比丘尼住清

淨地具清淨戒復次善男子若有菩薩受人  
重禁然後毀壞狂亂心熱欲自陳說無所歸  
趣無能滅者如是罪各僧以和合今出境界  
應大怖懼此人應往一空靜室塗治內外極  
令鮮淨請一比丘了知內外一部律者應自  
陳過向此比丘作如是言僧今償我來至此  
間我今請師亦來此間此師應教淨律之法  
所謂

婆羅隸

仇那羅隸

阿那羅隸

其那羅

隸

伽那隸

阿隸那隸

阿帝那隸

阿

帝那隸

莎呵

善男子如是陀羅尼者即是三世諸佛之所



護持亦是三世諸佛之所秘藏善男子吾昔  
未說今已說之昔所未作今日已作昔所未  
聞今日已聞聞此三因方便已令諸衆生遇  
此三因方便者速出三界如盲者見日如嬰  
兒得母如鳥出殼如飢人得食如縛者得脫  
如寒者得火如裸者得衣如迷人得路如渴  
者得水善男子我此法味亦復如是若久住  
世間若一劫若減一劫爲諸衆生受持讀誦  
解說其義爲愚者說當知是人與我無異住  
清淨地是人應於我生難遭之想自陳罪咎  
若罪不滅終無是處文殊師利白佛言世尊  
此陀羅尼者應讀幾遍修行幾日乃當止耶

佛言善男子此陀羅尼應誦六百遍乃一懺  
悔當懺悔時應所請一比丘在其前立口口陳  
罪必令得聞如是次第經六十七日占其夢  
想如上所說更無有異若得是相知是菩薩  
住清淨地具清淨戒復次善男子若有沙彌  
毘尼優婆塞優婆夷毀諸禁者亦應請一

比丘了知內外律者向形像前若尊經般若  
前自陳其過向此比丘此比丘應教淨律之  
法所謂

- 律伽羅帝 慕伽羅帝 阿帝摩羅帝 郁
- 伽羅帝 婆羅帝 座羅蝎帝 座羅蝎
- 帝 豆羅奢蝎帝 毗奢蝎帝 離婆蝎帝

婆羅隸阿隸

其羅隸阿隸

持羅隸阿隸

其蘭隸阿隸

提蘭隸阿隸

毗羅阿隸

莎呵

善男子如是陀羅尼者我爲慈愍一切衆生  
故說此陀羅尼若有下劣沙彌沙彌尼優婆  
塞優婆夷亦應讀誦修行此陀羅尼誦四百  
遍乃一懺悔如是次第四十七日當懺悔時  
應自陳過令彼了聞如是次第四十七日已  
如上所說夢中所見一一事者當知是沙彌  
沙彌尼優婆塞優婆夷住清淨地具清淨戒  
今時文殊師利及五百弟子心少有疑佛知  
其意即時告言如汝所念行者應修五事持

諸戒性所謂不犯陀羅尼義不謗方等經不見他過不讚大乘不毀小乘不離善友常說衆生妙行如是五事是行者業不犯戒性復次善男子不說上界所見亦不說已所行好醜之事亦應日日三時塗地亦應日誦一遍日一懺悔如是五事是行者業不犯戒性復次善男子復有五事若有比丘行此法者及與白衣不得祭祀鬼神亦復不得輕於鬼神亦復不得破鬼神廟假使有人祭祀鬼神亦不得輕亦不得與彼人往來如是五事是行者業護戒境界復次善男子復有五事不得與謗方等經家往來不得與破戒比丘往來

破五戒優婆塞亦不得往來不得與獵師家  
往來不得與常說比丘過人往來如是五事  
是行者業護戒境界復次善男子復有五事  
不得與腦皮家往來不得與藍染家往來不  
得與養蚕家往來不得與壓油家往來不得  
與掘伏藏家往來如是五事是行者業護戒  
境界復次善男子復有五事不得與劫人家  
往來不得與偷盜家往來不得與燒僧坊人  
家往來不得與偷僧祇物人往來不得與乃  
至偷一比丘物人往來如是五事是行者業  
護戒境界復次善男子復有五事不得與畜  
猪羊鷄狗家往來不得與觀星歷家往來不得

與淫女家往來不得與寡婦家往來不得與  
酤酒家往來如是五事是行者業護戒境界  
善男子如是七科五事行者應深了觀根原  
然後捨離其餘諸事亦復如是復次善男子  
行有二種一者出世行人二者在世行人出  
世行者不禁如上諸事在世行者吾以禁之  
何以故譬如嬰兒始能行時其母護持不聽  
遠行假使遠者或絕乳而死或墮水火故死  
或爲虎狼師子之所食噉或爲疾梨鷄梟所  
傷如是嬰兒母常將護不令暴害然後長大  
若有所作必能成辦善男子我亦是爲一  
切母一切衆生即是我子常爲護助令不遭

橫速出三界能有所辦若不如是制諸弟子  
云何當得阿耨多羅三藐三菩提耶如彼女  
人不制其兒云何長大能有所辦復次善男  
子我諸弟子若見如上諸惡律儀不善人輩  
占相吉凶治生買賣一不如法諸惡之事捨  
我法已而更貪著惡律儀法然後命終受無  
量苦我時見已心生慈愍為諸衆生設是方  
便令諸衆生乘是方便出三界苦得究竟樂  
吾今所以設諸方便救攝衆生今得究竟寂  
滅涅槃今時文殊師利及五百大弟子無量  
大衆歡喜奉行

大方等陀羅尼經不思議蓮華分第五

尔時祇陀林中無量億千那由他大衆之中  
有寶蓮華從地涌出高十多羅樹其華有八  
十万恒河沙重一一重中有一佛與無量大  
衆前後圍遶爲說陀羅尼義如是次第八十  
万恒河沙諸佛各說陀羅尼義而此華中放  
大光明遍至三千大千世界尔時大衆見此  
瑞已得未曾有不知爲以何緣忽有此相尔  
時大衆各有疑惑如來何緣示現如是妙寶  
蓮華其中諸佛說妙法藏各各相謂今當問  
誰尔時文殊師利知大衆心疑即從座起偏  
袒右肩右膝著地而白佛言世尊五百大弟  
子及一切大衆心有疑惑我亦未了此華名



何爲以何緣忽來到此此華不可思議復有  
諸佛而在其中與無量大衆說妙法藏此事不  
可思議復有光明普照十方微塵世界此事  
亦爲不可思議此華復有三十二種微妙莊  
嚴亦不可思議此華有如是四不可思議此華  
名何其中諸佛光明重數而從何方忽來在  
此以何因緣而現此相尔時佛告文殊師利  
善男子此華者名優曇鉢羅羅闍其中諸佛  
名釋迦牟尼俱同一字是諸佛等我乃久遠  
常以供養於諸佛所深入法性汝等大衆亦  
應供養尔時無量大衆即從座起各各奉華  
供養諸佛到已頭面禮足華供養已瞻仰諸

佛目不暫捨。尔時舍利弗念欲供養是諸佛。故即修神通。遶此華王經八十七日。百千万分不周。其一即大號泣。涉路而還。到大衆中。而白佛言。我定失神通而無疑也。何以故。向與無量大衆往詣佛所。念欲供養是諸佛。故我即修通。欲循觀此華經八十七日。百千万分不周。其一以是因緣。我今定知必失神足。而無疑也。尔時佛告舍利弗。假使鳥飛疾於電光。百千万倍。有阿羅漢復過於。是百千万倍。復有菩薩復過億倍。復有菩薩復過万万倍。假使百千万億劫。猶尚不周。况八十七日。汝能周耶。咄善男子。女不失通。譬如鹽火。

如微塵此鹽自謂世間鹹者更無過我世有  
智者而便取之投之於海唐失其身鹹何所  
在汝等聲聞亦復如是神通大小如彼鹽耳  
法味多少如彼鹹味云何欲知此華邊際尔  
時世尊即從座起到蓮華所以華供養是諸  
佛等華供養已即說陀羅尼曰

娑呵羅帝一 娑帝羅毗留賴多二 唎呵帝莎呵三 呵

梨呵啞知阿醯四 蒲醯呵鬱呵蚘醯五 蒲醯蚘醯

槃蚘醯六 阿菟蚘醯七 阿菟蚘醯醯蚘八 復蚘醯

醯蚘九 蒲蚘醯醯蚘十 復蚘醯醯蚘十一 蒲蚘醯醯

蚘十二 復蚘脇復蚘槃啞知十三 莎呵十四

尔時諸佛各各說陀羅尼已尔時世尊即從

座起語諸佛言今此大方等陀羅尼經當囑  
授誰耶尔時會中有八十万恒河沙法身大  
士即從座起恭敬合掌白佛言世尊我等從  
今日若佛在世若去世後若有善男子善女  
人能修行解其義者若城邑聚落淨處若山  
林樹下神仙居處修行此經解其義者我等  
八十万恒河沙菩薩必往彼人所擁護此人  
令不遭橫身無疲倦常得色力名譽等利此  
人所至到處我等菩薩往彼人所作種種宮  
殿飲食卧具隨意供給令無所乏以此陀羅  
尼故如是供給令其不失上妙之心尔時諸  
佛語諸菩薩善哉善哉舊住娑婆土者能受

持修行陀羅尼典及以供養持此典者即爲  
供養十方諸佛汝等不久當得阿耨多羅三  
藐三菩提何以故此經有無量威神力故汝  
等受持此經有無量方便汝等受持此經有  
無量慈悲汝等受持此經有無量神通汝等  
受持此經神力如是云何不得阿耨多羅三  
藐三菩提今時諸佛告諸菩薩善男子若諸  
佛在世若去世後若有衆生來詣汝等一一  
菩薩者若欲定問何者當先得阿耨多羅三  
藐三菩提汝等應示能修行解其義者或有  
問者何人先入揔持陀羅尼門汝等應示能  
修行解其義者或有問言何者能知十方世

界莊嚴之事汝等應示能修行解其義者或  
有問者何人當生嚴淨世界汝等應示能修  
行解其義者或有問言何人來世作轉輪王  
汝等應示能修行解其義者或有問者何人  
當於來世能廣化衆生令堅住阿耨多羅三  
藐三菩提心汝等應示能修行解其義者或  
有問者何人當於來世爲諸佛所讚汝等應  
示能修行解其義者或有問者何人能知十  
方世界有邊際無邊際耶汝等應示能修行  
解其義者或有問者何人能遠離六賊汝等  
應示能修行解其義者或有問者何人能離  
諸煩惱賊汝等應示能修行解其義者或有

問者何人能離十二食也汝等應示能修行  
解其義者或有問者何人能離十纏汝等應  
示能修行解其義者或有問者何人能離三  
種甜食汝等應示能修行解其義者或有問  
者何人能離毒害汝等應示能修行解其義  
者或有問者何人能離四毒汝等應示能修  
行解其義者或有問者何人能離一詐親者  
汝等應示能修行解其義者或有問者何人  
能離世惡知識汝等應示能修行解其義者  
或有問者何人不為三愛所牽汝等應示能  
修行解其義者或有問者何人能於今世後  
世不謗方等經汝等應示能修行解其義者

或有問者何人能知十方世界幾許衆生發  
三菩提心幾許衆生發聲聞緣覺心汝等應  
示能修行解其義者或有問者何人能分別  
十方諸佛說法之聲緣覺聲聲聞聲具住菩  
薩聲不具住菩薩聲轉輪王聲諸天聲婆羅  
門聲大臣聲富聲貧聲樂聲苦聲夜叉聲餓  
鬼聲地獄聲畜生聲劫數苦報聲非劫數苦報  
聲汝等應示能修行解其義者或有問者何人  
能別世間諸香海渚彼岸香多摩羅伽香頻  
婆伽羅婆香婆首伽羅香熏陸伽香蘇曼陀  
香婆師伽香塗香末香雞舌香沉水香常在  
世香非常在世香佛菩提香菩薩究竟香聲



聞分段香緣覺限際香初果人香非初果人  
香究竟涅槃香非究竟涅槃香分際香非分  
際香轉輪王香粟散王香大臣香婆羅門香  
居士香童男香童女香非童男童女香地獄  
餓鬼畜生香十方世界香非十方世界香汝  
等應亦能修行解其義者復次善男子若諸  
佛在世若去世後若有衆生得遇此陀羅尼  
者當知是人去佛不遠譬如巧木作家往趣  
林野到諸山中先見小木必定自知吾今得  
木而無疑也若使諸佛去世之後若有衆生  
遇此陀羅尼者當知是人去佛不遠如人趣  
河遙聞水聲必定自知吾今得水而無疑也

若使諸佛去世之後若有衆生得遇此經當  
知是人去佛不遠譬如迷人還得正路必定  
自知去舍不遠必無疑也若佛去世後若有  
衆生得遇此經當知是人去佛不遠而無疑  
也如掘井家漸見濕土必定自知去水不遠  
而無疑也若使諸佛去世之後若有衆生得  
遇此經當知是人去佛不遠今時諸佛告諸  
菩薩當來有劫名妙音幢華彼界有城名無染  
劫劫中有國名妙音幢華彼界有城名無染  
行城中有王名曰嚴身此嚴身王常以十善  
教化衆生汝等菩薩當生此王家出家學道  
次第成佛俱号釋迦牟尼今時此華從地出

已在於虛空放大光明於此光中有種種妙  
聲讚諸菩薩善哉善哉諸菩薩等汝等不久  
實當得於阿耨多羅三藐三菩提如諸佛語  
而無疑也汝等必當堅固阿耨多羅三藐三  
菩提得常樂我淨是時此華於虛空中忽然不  
現。爾時五百大弟子心有疑惑作如是唱言  
嗚呼異哉以何因緣有如是事此大蓮華無  
有邊際在於虛空忽然不現。今何所在不知  
歸趣。此華中有無量諸佛。今亦隨無。爾時佛  
知衆會心念告諸大衆。我今所說陀羅尼典  
今亦當無。如彼華相一切諸法如幻如化如  
虛空雲一切諸法亦復如是。假使有法過於

是華亦如幻化而無定相善男子不須驚疑  
如是等事非汝聲聞之所思議向所出華是  
陀羅尼力今還無者亦陀羅尼力欲說陀羅  
尼故此華從地涌出今已說竟此華還無非  
汝聲聞之所議也諸法興故相貌亦興諸法  
衰故相貌亦衰陀羅尼興故諸華亦興說陀  
羅尼竟故諸華衰滅善男子汝不見乎我向  
初轉法輪之時無量無邊大衆人天阿脩羅  
等前後圍遶是名法興我已說竟名諸法衰  
天人阿脩羅隨意所往當知諸法如幻化相  
譬如人生至於五十常趣衰路我所說法亦  
復如是初始說時已有盡性非說已而有此

盡性也此華初出必有去性無有疑也法性  
常尔何所疑耶尔時佛告阿難汝當受持此  
陀羅尼經我今出世已三轉此陀羅尼經初  
始說時付囑於汝救攝衆生病苦之厄第二  
說時救護我法令諸波旬不得毀亂今第三  
說者皆為救攝一切衆生置於涅槃是故一  
法方便三說度諸衆生以此三法付囑於汝  
譬如長者有三方便常用行身心方便念眼  
方便視手方便作如是三事和合成一我此  
陀羅尼亦復如是初說喻心二說喻眼三說  
喻手雖有三名其實是一一佛菩提如彼居  
士臨欲終時唯有一子以此三事付囑於子

子已受教然後修行常得高位善男子我即  
汝父汝是我子修我三因大方便者然後得  
作天中尊王如居士子而順父教然後高貴  
若不順父教云何而貴汝若不順我此教者  
云何而得天中尊王復次善男子譬如大河  
在於大谷於意云何谷大河大耶阿難言世

尊谷能成河非河成谷谷必大也佛言善哉  
善哉善男子快說是語谷喻於我河喻於汝  
谷擁大水展轉而流到於大海若復有水而  
不修谷漫墮鹵土為鹵所淋而失其身善男  
子復有一水住在谷中而不肯出善男子谷  
喻大海用喻於我水喻菩薩住喻聲聞鹵喻

緣覺雖入鹵中展轉而行入於大海雖住谷  
中展轉所推亦入大海善男子如是三事都  
歸大海我今所說陀羅尼義初說救病二說  
救法三說救身雖三名說其實是一復次善  
男子譬如大樹因地而生頭有二竒於意云  
何樹因地生地因樹生耶阿難言世尊樹因  
地生非樹生地善男子快說是語地喻於我  
樹喻菩薩竒喻聲聞緣覺善男子如是三事  
可言非類不阿難言一類所生不可異也何  
以故一大地生故一根長故不可言非類也  
佛言善哉善男子我所說陀羅尼義亦復如  
是而無有異何以故一金剛身故一意生故

一口說故以是因緣而無餘雜我今以三說  
陀羅尼以付囑汝一佛菩提乘亦付於汝汝  
今諦聽受持慎莫忘失此陀羅尼若我去世  
汝常流布此陀羅尼又告阿難譬如國王髻  
中明珠愛之甚重若臨終時授與所愛之子  
我今為諸法王此經即如髻中明珠汝如我  
子今以此大方等陀羅尼經授與於汝譬如  
此王以髻明珠授與其子又告阿難譬如大  
王領一切國臨欲終時國正之事付囑於子  
我今亦復如是為一切諸法中之王而得自  
在大小乘典付囑於汝譬如此王好醜之事  
付囑於子阿難我今以此大方等陀羅尼經



付囑於汝若有衆生來詣汝所欲求此經如上十二夢王汝當善爲說其事相前人所可爲說境界之事於一會中莫爲多說譬如估客周旋四方若到一國若賣寶時都不示人汝今亦應如是少少而說又復阿難譬如女人而有一子作諸飲食置舍宅中都不示子如是諸食都爲其子終不頓與悉令盡也汝今亦應如是不應一會悉爲衆生盡說境界之事復次阿難此陀羅尼者不得用呪方道病軋陀鬼病狂亂鬼病不語鬼病不開眼鬼病吸人精氣鬼病唾人鬼病視人鬼病食膿血鬼病棄米火鬼病魑魅鬼病迷人鬼病食髮

鬼病能令人無心識。鬼病食人心。鬼病大疫。鬼病若有如是諸病。悉不得用除自憶念大方等陀羅尼。經何以故。非對治故。善男子。於汝意云。何若有善男子。善女人。磨大地土。而用作食。供四大身。日日常食。得活身不阿難白。佛言。不也。世尊。如是等土。非本所食云。何活身。佛告阿難。善哉。善哉。善男子。實語不虛。土定不中食。我今此法定不中用治。下世病何以故。此陀羅尼非對治。故阿難。我今已說大方等陀羅尼所應受持者而已。受持所應化者而已。受化所應說者。我已說。竟所應持者。菩薩持竟。聲聞所持而未應也。阿難於

汝意云何受持如是章句不阿難白佛言世  
尊我當受持如是章句若佛去世之後若有  
比丘比丘尼優婆塞優婆夷婆羅門婆羅門  
子居士居士子天龍夜叉摩睺羅伽等若來  
詣我所推問陀羅尼義我當為說如佛世尊  
願賜聽不佛告阿難善哉善哉真我弟子真  
用我行出三界苦善哉善哉阿難衆生不能  
受持如是經典違犯重戒毀謗正法逆害聖  
人忤殺父母阿難以是因緣我今重以此經  
付囑於汝當為衆生除滅重罪尔時阿難及  
五百大弟子文殊師利及諸菩薩波斯匿王  
及五百比丘優婆塞優婆夷居士居士子及

與十方天子婆藪大士及諸罪人八十五億  
恒河沙諸菩薩九十二億諸天人阿脩羅無  
量大衆歡喜奉行各禮佛足頂戴信受

大方等陀羅尼經卷第四

可

毘

昔扇反

掘

巨月反

鷄臬

上尺脂反 下古堯反

啞知

上田結反 下音知

瀨

郎太反

渚

之古反

郎古

